

來北方天鼓音王如來見四如來十方無量
如來身廣大威德承於諸佛大悲願力久住
世間從此命終當生淨妙佛刹於一切處供
養承事諸佛如來爾時世尊說是經已菩薩
摩訶薩并天龍藥叉乾闥婆阿脩羅迦樓羅
緊那羅摩睺羅伽人非人等皆大歡喜信受
奉行

觀自在菩薩說普賢陀羅尼經

佛說八大菩薩曼荼羅經

唐三藏沙門大廣智不空奉詔譯

如是我聞一時薄伽梵住補怛落迦山聖觀
自在菩薩宮殿與百千俱胝那更多菩薩前
後圍遶爾時衆中有一菩薩名曰寶藏月光
從座而起整理衣服偏袒右肩曲躬合掌白
言薄伽梵我有少疑惟願如來聽許諮問於
是如來應等正徧知告寶藏月光菩薩言若
善男子善女人作八曼荼羅者云何建立復
依何法趣無量福令修行者速證菩提爾時

如來讚寶藏月光菩薩言善哉善哉善男子
汝能問如是甚深之義而為利益無量無邊
有情與安樂故又能淨除三惡趣故為證無
比無上智故汝今善聽若諸有情纔聞此密
言者得長壽樂善男子有八曼荼羅是八大
菩薩甚深法要若有有情依法建立此八曼
荼羅一徧者所有十惡五逆謗方等經皆悉
消滅一切所求義利勝願悉得成就即說如
來密言曰

唵引摩訶尾囉娑嚩引二合賀引二

即曼荼羅中想於如來真金色身三十二相
坐蓮華臺

次說觀自在菩薩密言曰

吽引纈唎二合郝三鉢納麼二合室哩二合曳娑
嚩引二合訶引四

即想曼荼羅中聖觀自在身赤色左手持蓮
華右手施願頭冠中有無量壽如來

次說慈氏菩薩密言曰

每訶哩爾娑嚩引二合訶引一

於觀自在菩薩後想慈氏菩薩金色身左手

執軍持右手施無畏冠中有窣堵波半加而

坐

次說虛空藏菩薩密言曰

阿引蘖婆也娑縛引二合訶一引

於佛背後想虛空藏菩薩左手持寶安於心

上右手施流出無量寶

次說普賢菩薩密言曰

纈唎合惹也娑縛引二合訶一引

虛空藏菩薩左邊想普賢菩薩戴五佛冠金

色身右手持劍左手施願半加而坐

次說金剛手菩薩密言曰

唵引鏐囉縛娑縛引二合訶一引

於如來左邊想金剛手菩薩右手執金剛杵

左手安於胯戴五佛冠身青色半加而坐

次說曼殊室利菩薩密言曰

室利合閼嚩誡娑縛引二合訶一引

於金剛手菩薩前想曼殊室利童真菩薩五

髻童子形左手執青蓮華華中有五股金剛

杵右手作施願身金色半加而坐

次說除蓋障菩薩密言曰

匿伐羅拏娑縛

引二合訶引

於曼殊室利菩薩前想除蓋障菩薩金色身

左手持如意幢右手施願半加而坐

次說地藏菩薩密言曰

乞灑

合訶囉惹娑縛引二合賀引

於如來前想地藏菩薩頭冠瓔珞面貌熙怡
寂靜愍念一切有情左手安齋下拓鉢右手
復合掌向下大指捻頭指作慰安一切有情
想此八大菩薩曼荼羅供養觀行法若善男
子善女人受持此曼荼羅經一切業障悉皆

消滅速證無上正等菩提佛說是經已諸大
菩薩及聲聞衆一切天龍八部聞佛所說歡
喜奉行

八大菩薩讚

圓寂宮城門

將一能摧戶扇者

十諸佛法受用

救世我頂禮

自手流清水

能除餓鬼渴

三界如意樹

頂禮蓮華手

大慈水爲心

能息瞋恚火

頂禮慈氏尊

能斷欲弓弦

虛空藏妙慧

虛空寂靜尊

生死流解脫

頂禮佛心子

無邊有情惑

能息無益心

普賢我頂禮	善逝上首子	塵勞盡僮僕
超勝摩羅宣	頂禮金剛手	能說一切明
頂禮妙吉祥	持妙童子形	舒徧智慧燈
攘奪三界暝	一切除蓋障	是故我頂禮
無盡智慧尊	能生無竭辯	如地諸有情
所依一不斷	堅慧悲愍藏	地藏我頂禮
此真善逝子	讚揚所獲福	以此諸有情
如彼成讚器		

佛說八大菩薩曼荼羅經

佛說能淨一切眼疾病陀羅尼經

唐三藏沙門大廣智不空奉詔譯

如是我聞一時薄伽梵住迦毗羅衛國釋迦
種族聚落爾時有一釋種住車尼摩迦聚落
於佛淨信於法淨信於僧淨信歸依於佛歸
依於法歸依於僧不疑於佛不疑於法不疑
於僧盡心於佛盡心於法盡心於僧決定於
等覺勝趣其人眼所見色相而不得見爾時
乞臘摩迦釋種憶念如來作是言稽首佛世
尊智炬陀羅尼能作光明者歸命善逝大悲